



ATASSUT
Postboks 399
3900 Nuuk
+299 32 33 66
+299 34 62 53
Fax: +299 32 58 40
atassut@greennet.gl
www.atassut.gl

Nuuk 15. september 2006

Inatsisartut Suleriaasianni § 36, imm. 1 naapertorlugu Naalakkersuisunut apeqquteqaat imaattoq matumuuna saqqummiupparput:

Naalakkersuisunut apeqqut: Qilalukkanik pisassiisarneq pillugu inatsisit atuuttut malitsinneqarneri naammaginarpat imaluunniit atuutsitsinissamut sukaterisoqartariaqarpa?

(ATASSUT-ip Inatsisartuni ilaasortaataitai: Augusta Salling, Ellen Christoffersen, Thomas Kristensen, Kristian Jeremiassen, Godmand Rasmussen)

Tunnngavilersuut:

ATASSUT-mit pingaartipparput nunatsinni piniarnermik ingerlatsineq piujuaannartitsinissaq toqqammavigalugu ingerlanneqassasoq, taamaammat pissusissamisoorpoq uumasut piniarneqarsinnaasut ilaat inatsisitigut killilersorneqartarmata.

Taamatulli ATASSUT-mit oqareerluta erseqqissassavarput arajutsisimanginnatsigu uumasut killilimmik piniarneqarsinnaasut pillugit inatsisitigut toqqammavissaritinneqartut naammaginartumik malitsinniaruminaatsinneqarsinnaasartut.

Assersuutigalugu qilalugarniartarneq pillugu Inatsisartut inatsisaat nr. 29, 18. december 2003-meersoq tunnngavigalugu Nalunaarut nr. 2, 12. februar 2004-meersoq pilersinneqarnikuvoq.

Nalunaarummilu pineqartumi § 3-mi aalajangersarneqarsimavoq Naalakkersuisut qilalukkanik qaqortanik qernertanillu ukiumut pisassiiviusumut pisassiissutissanik aalajangersaasussaasut, taamatutaaq § 3, imm. 6-mi aalajangersarneqarsimavoq ukioq pisassiiffik 1. juli-miit 30. juni-mut ullut taaneqartut ilanngullugit pisassiisoqartassasoq.

Ilisimaneqarporli pisassiissutissat pillugit aalajangerniartarneq ilaatigut piffissaq eqqorlugu pinngitsoortartoq, taamaalillunilu pisassiigallarnerit tunnngavigalugit qilalugarniarneq piffissap ilaani ingerlanneqartariaqartarluni.

Tamatuma kingunerisaanik piniarnermik inuussutissarsiuteqartunut kipiluttunartorsiortsitsisoqalersoortarpoq, Naalakkersuisummi pisassiinissamut piffissaq eqqorlugu aalajangersaasimangikkaangata qilalugartoqarsimatillugu pisaqarneq unioqqutitsinertut naqissuserneqarsinnaasarmat.

Assersuut taanna toqqammavigalugu matumuuna ATASSUT-mit Naalakkersuisunut makkuninnga apeqquteqaateqassaagut:

- 1) Nalunaarut malillugu pisassiinissamut ulluliussat malinneqarsinnaaqqullugit Naalakkersuisut sukaterinissamik qanoq ittunik pilersaaruteqarpat?
- 2) Nunatta isorartunerujussua qilalukkallu eqimattakkaat immikkoortuuneri tunngavigalugit ukioq pisassiiffiusoq naapertuuppa imaluunniit ukiup qaammataanut naapertuuttunngorsaasoqartariaqarpa?
- 3) Pisassanik akuersissutinik tunniussineq agguaassinerlu kommunet aqqutigalugit ingerlanneqartarpoq, taamaattorli Naalakkersuisut pisassiissutinik utertitsisinnaapput kommunet pisassanik agguaassivigineqarsimasut avaqqullugit, pisassanik agguaateriikkanik utertitsinermut inatsisitigut toqqammavigineqartut suuppat?

Tamatuma saniatigut unioqqutitsisoqarsimatillugu arfattassanik utertitsisinnaaneq pillugu matuminnga ATASSUT-mit apeqquteqaateqassaagut:

- 4) 21. august 2006 Uummannap kommuneani unioqqutitsilluni tikaagulliusaarnamik pisaqartoqarsima tunngavigalugu Uummannami piniartut qoorortoorsorlutik tikaagullinniarsinnaatitaanerat unitsinneqarpoq. Soorunami uumasut eqqissimatitaasut piniarneqassanngillat, matumanili paaserusunnarpoq inatsisitigut suna tunngavigalugu tikaagullittassat arsaarinnissutigineqarnesut, tikaagulliusaarnamimmi pisaqartoqarsimaneq tikaagullittassanut attuumassuteqarsorinangimmat.